

19 DEC 1998

Hishammuddin-Institusi

PEMUDA DINASIHAT UTAMAKAN INSTITUSI KEPARTIAN

TANAH MERAH, 19 Dis (Bernama) -- Pemangku Ketua Pergerakan Pemuda Umno Datuk Hishammuddin Tun Hussein menasihatkan pemuda supaya lebih mengutamakan institusi kepartian daripada pemimpin.

Katanya, pemimpin boleh pergi dan datang sedangkan parti akan terus kekal sebagai suatu institusi yang akan menentukan corak hidup bangsa dan negara.

"Individu boleh pergi dan hilang tetapi institusi (parti) tetap kekal," katanya ketika berucap pada majlis Pemimpin Bersama Rakyat di Sekolah Kebangsaan Chetak di sini, petang semalam.

Hishammuddin berkata, perpecahan yang berlaku di dalam Umno disebabkan anggota tidak lagi menghormati institusi kepartian tetapi mengutamakan pemimpin tertentu semata-mata.

Katanya, kumpulan itu juga tidak lagi menjadikan institusi kepartian sebagai badan tertinggi yang harus dijaga keharmonianannya dari diguna oleh pihak lain untuk menimbulkan perpecahan.

Beliau berkata, kesetiaan kepada Perdana Menteri Datuk Seri Dr Mahathir Mohamad yang kebetulannya seorang pemimpin yang dipilih dan telah menunjukkan kepimpinan baik dan berkesan.

"Kita sebagai anggota, adalah bertanggungjawab memberi sokongan yang padu kepada kepimpinan Perdana Menteri," katanya.

Beliau yang juga Timbalan Menteri Perusahaan Utama berkata tidak mustahil negara akan menghadapi perpecahan sebagaimana dialami oleh Afghanistan, Iraq, Bosnia dan Indonesia sekiranya diberikan peluang kepada pihak luar mencampuri urusan negara ini.

Katanya, kuasa besar akan berusaha untuk menimbulkan suasana tidak tenteram dengan menjadikan kumpulan yang tidak puashati dengan tindakan Perdana Menteri sebagai alat.

Bagi pemuda, tidak rela ada pihak luar cuba mencampuri urusan dalam negara ini, katanya.

-- BERNAMA

MNR RHM